

2017 LAMENTO BORGO MESTRE

Co 'sta calupa e 'sté brunèste
Eco qua el Borgo Mèstre!
Pièni de grinta e de corajo
Oncora reclamémo el sotopasajo!
Del passo iniziale magnà xé i schèli:
desso i studia percorsi alternativi,
tuti co le man a strucarse i sarvèli....
pì no ve credémo.... gran lavativi!
dessipà me gavì i posti pì bèli.
Gnanca pì on posto dove stare in pase,
par tuto machine fin dentro le case!
Ocio che el popolo mia senpre tase!
Mési la mestrina ciusa o alternada
Pa farghe l'inèsto so st'altra strada:
picolo sacrifissio pa 'l novo progrèss,
ma varda el vantagio che ne vién dèss!
pericoli e sporchessi a no finire
che i me lassa gratis a preminère!
Po' che tuti garà inpenio el buelo,
Resta i bessì par qualcosa de belo?
On posto che sia adato e funksionale
Par le asociazion del ramo sociale

Cultura, Caritas e Pensionati

Ridoti nei loghi pì disperati.

Ricordève: so questo mèsurèmo

Chi a ministrar Noal siéliarémo!

Ghe saria tante robe brute e bèle,

lamenti, da dir, storie e cavatèle,

però me prème tanto farve i auguri

de passare dei zorni manco duri

par 'sti ani e anca par quei futuri!

Che dolori e malatie staga distanti

xè l'augurio che femo a tuti quanti!

Che mai ve manca salado e menestre

AMOR E PASE....

VIVA BORGO MESTRE!!!!

22/11/16 Noale

Dino Libralato

BORGO MIRAN LAMENTO 2017

Eccome qua: sémo el borgo par Miran
Co braghe rote e buganse a le man!
Vardè che no sémo gnénte contenti
De 'sti nostri governanti
Co oci dolzi e soridenti
Par inbaucarme tuti quanti!
Tuti che vòle comandare
Sensa gnente po' saver fare.
Tuti ciacola de sbarchi e migrazion
Mostrando oci lustri de comozion,
Ma quando xé ora de far qualcosa
I diventa frédi come la bròza!
No ghe xé posti so sto paese
Né so le case, né so le ciése:
dassa che 'l diga papa Francesco
a 'ndarghe drio.... te staressi fresco!...
Solo fastidi e tante spese
Che se strassina co fa sarèse!
Cussì spetarémo in conclusion
Fin che no me riva 'na revolusion!
Pa 'l problèma de 'sto borgo sbandonà
Sentime cossa che gavémo pensà:
Farémo come l'Ongaria
Parché la storia vaga finia:
sarémo a metà le strade traversè,
che nissun passa verso borgo Mèstre
e po' co on referendo de quei fini
farémo comune col Borgo Valentini
senza altro pagar solo de le tasse
par quei quatro siòri de le do piasse
che par noialtri no li fa mai gnente
sofegandone nel fumo spussolènte!
Però, visto che ben o mal xè finio
Anca 'sto cancaro de ano bisesto,
speremo che, co la grassia de Dio,
no li me toga ancora pa 'l çesto!
E a denti streti, ma cuore sincèro
Ve femo i auguri par l'ano intiero!

A tuti, giorni boni, caldi e bèli
che ai sposi ghe nassa tanti putèli,
scomisiando subito e no da doman!
co li saluti del Borgo par Miran!

29/11/16 Noale

Dino Libralato

BORGIO CANPOSANPIERO – LAMENTO 20017

Canposanpiero!, xé questo el mèjo colmèlo!

Tuti so l'atenti, in man el capèlo!

No semo vegnui pa portar lagnanze,

Co piè giazai e pieni de buganze,

Ma... del grassie.... pa intonar la canta,

De tuto quel che no me manca.

Ghemo 'na strada stréta e longa,

Da traversar senza strisse ne rotonda.

Pa trovar on pasagio pedonale

Te fè la corsa del simiòto,

Da la scuola comunale

Fin vanti....., dopo Foloto.

Par scuole no se volemo lamentare:

Ghemo asilo, media ed elementare

E gnanca on parcheggio dove spetare

I tosati che co piove riva tuti inbrombai

Grassie a ste pensiline costruie....mai!

Jèrimo la mèjo tèra da raccolti

Dèssò... canpi sassina, tuti stravolti

A coltivarli nissun ga pì vòja:

se produse solo sère, çimisi e sòia!

**Tuti prodoti a kilometro zèro,
Consumo del suolo ridòto a zèro!!!!
Grassie ancora, e grassie par da véro
Che ghemo passà n'altro ano intièro.
Che sto domilediisète vègna bon
Sparagnandome qualche sgorlon.
Sta speranza bona porta da vero
Tuto el Borgo par Canposanpièro!
Galine e vovi pa 'l domilediisète,
Bote pièna, formento e galéte!
Bona salute e malatia nissuna,
Co tanti bocie dentro la cuna!**

27/11/16

Dino Libralato

La vera e originale ricetta de la felicità

(ossia le vere cause de na guera)

***La ricetta xé proprio adata par tuti,
par i momenti beli, ma anca bruti!***

***Conossua la xé da mijèri de ani,
no valida solo par i Cristiani,
ma par Ebrei, Induisti e Mussulmani,
me fa guera pa averla i Talebani!!!!***

***Bigoli grossi col tastasal,
vin bianco o rosso, on bon bocal.***

***Fasioli fissi come un purè,
‘na bona bossa de cabernet!***

***In tòcio, conso o mantecà
o a la visentina, ‘l bacalà,
dopo fermo un dì a riposo
negà el ‘ndaria in tel raboso!***

***Poenta brustolà e luganega
Vérze sofegà, vin ‘na caneva!***

***Radicio scritto de Castelo,
salado scotà e corbinelo!***

Martondele in tecia co ‘l velo,

pinoli, pevaro e uveta:

de vin crinton ‘na bocaleta!

***Drio polenta co cren e museto',
de merlot meti un bon fiaschetto!***

***Formagio vecio furlanESCO
co on bosson de pataresco!***

***Festejar co finisse l'ano
ghe vol 'na scuola de trebiano!***

***Bagigi e nose in abbondanza,
menole e trutego co creanza,
po' a fine, se gavi pazienza,***

***'na gran mostarda de Vicenza,
e de Cologna mandolato***

co on biciarin de torcolato!

***A bombardare co sti piati boni
tanto mejo saria che no i droni,
merlot, cartizze, panetoni e grana
scometo vinsar so na settimana!***

***Nissuna ofesa so 'l proprio orgolio:
gnente bonbe par scanbio de petrolio,
mi so convinto e desso spero tanto
so un miracolo de l'Ano Santo!***

*Fiol spiritual del vescovo de Soave,
Zonin, co i lo ga scargà da la nave,
restando disocupà ormai del tuto
pensa de inbastir n'altro istituto
studiando co cura el novo progetto
batezà "Co la Banca mi Ve-nèto"!
el rimete a fruto la so esperienza
par inviar el zogo...ma co pasiensa!*

PRONOSTEGO 2017

**ma...visto 'l caligo e 'sto cielo scuro...
che del tuto la possa essar vera,
gnanca mi no saria proprio seguro
scoltème ben...cossa dirò staséra!**

**Desso xé ora de trar la sentenza
Che par che ne vérza a bona speranza**

**El fumo, spènto da la tramontana,
Se invia tra Vicenza e la Padovana,
ciamando anata né bona né bruta:....
co ghe saremo a cao.... ve la dirò tuta!**